



Broj: 02-04-1260/19
Datum, 07.01.2020. godine

ZAPISNIK **sa 32. redovne sjednice 6. saziva Općinskog vijeća Doboj Istok**

Tridesetdruga redovna sjednica 6. saziva Općinskog vijeća održana je dana 28.12.2019. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, sekretar općine, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Alirizah Mujkić, pomoćnik općinskog načelnika za poduzetništvo i finansije, Sulejman Delić, pomoćnik općinskog načelnika za civilnu zaštitu i Abdulah Hrnjičić, ovlašteno lice za zamjenjuje pomoćnika općinskog načelnika za prostorno uređenje, te predstavnik RTV TK.

ODSUTNI: Fajik Muratović, vijećnik SDP.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „ Sve vas selamim i pozdravljam. Na samom početku pročitat ću vam spisak članova kluba SBB i BPS Sefer Halilović. Klub vijećnika SBB – BPS Sefer Halilović čine sljedeći vijećnici: Senada Džanić i Kemal Skopljak. Za predsjednika kluba izabrana je Senada Džanić, a za zamjenika predsjednika kluba Kemal Skopljak. Znači došlo je do izmjene kluba. Koristim priliku da vas sve selamim i pozdravim. Molim tehničkog sekretara da nam provjeri prisutnost vijećnika. Prisutno je 16 vijećnika, a odsutan je Fajik Muratović.“

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Poštovani predsjedavajući, dopredsjedavajući, kolege vijećnici i vijećnice, poštovani pomoćnici općinskog načelnika, gostiju nema, predstavnici medija želim sve iskreno da vas poselamim i pozdravim i da vam poželim ugodan i lijep dan. Ja imam jedno vijećničko pitanje i jednu vijećničku inicijativu. Vijećničko pitanje upućujem Općinskoj službi za poduzetništvo i finansije, odnosno Poreznoj upravi Federacije Bosne i Hercegovine, Ispostava Doboj Istok. Vijećničko pitanje glasi:

- 1. Da li JP „Elektroprivreda F BiH“ odnosno „Elektrodistribucija Tuzla“ ima registrovanu podružnicu na području općine Doboj Istok?*
- 2. Ukoliko ima registrovanu podružnicu, da li je poznata adresa na kojoj se nalazi i da li ima prijavljenih radnika u toj podružnici, odnosno poslovnoj jedinici?*

Pošto su različita i oprečna mišljenja ja bih volio da dobijem zvaničan odgovor. Možda je to trebalo nasloviti i na Elektrodistribuciju Tuzla, ali evo Općinska služba i Porezna ispostava Doboj Istok vjerovatno imaju te podatke, jer nama računi dolaze od Elektrodistribucije Tuzla, ne znam kako je definisano, osnovno odjeljenje Doboj Istok. Ja se nadam da ću dobiti odgovor. Inicijativa je sličnog karaktera, pa se nadam da ću dobiti podršku Općinskog vijeća za tu inicijativu. Inicijativa glasi: Pozivam Općinsko vijeće Doboj Istok da donese zaključak da se uputi dopis, odnosno „protestna nota“, ne znam kako bi tačno formulisao to pravnici znaju, prema JP Elektroprivreda FBiH, odnosno Elektrodistribucija Tuzla zbog učestalog isključenja električne energije na području cijele općine Doboj Istok. U posljednjih 5 – 6 mjeseci došlo je 3 puta do potpunog obustavljanja isporuke električne energije na području cijele općine Doboj Istok pod izgovorom remont trafo stanice što je zaista nedopustivo. Prema mojim saznanjima mi smo jedina općina na Kantonu, a i šire, gdje dolazi do potpune obustave električne energije u kompletnoj općini. Mislim da je potrebno kod ovakvih situacija obezbijediti, ako dolazi do tih situacija, alternativno snabdijevanje električnom energijom. Razlog za ovu inicijativu je što mislim da se i Općinsko vijeće treba da oglasi, jer je po meni ovo veoma bitan problem. Malo sam ispitivao i u praksi nisam dobio odgovor da na području jedne kompletne općine dođe do prekida isporukom električne energije nekih 8 sati. Kažem zadnji prekid u snabdijevanju je bio u prošlu nedjelju u periodu od 9 – 17 časova i veliku štetu trpe domaćinstva, a posebno privredni subjekti. Ja mislim da ima načina da se to prevaziđe. Navest ću primjer, ja znam za svoju firmu da su po dolasku električne energije stradala dva računara i jedan fiskalni uređaj zbog nečega. Ne znam da li je to zbog puštanja visokog napona, odnosno oscilacija u naponu, ali mislim da je nedopustivo i smatram da Općinsko vijeće treba jednostavno da reaguje prema Elektrodistribuciji Tuzla. Mi smo izabrani od građana i mislim da treba da stanemo u zaštitu naših građana i privrednih subjekata. Ja sam kontaktirao ljude iz drugih općina i kada plasiram ovu informaciju ljudi se ibrete i čude, jer je nedopustivo da komplet općina Doboj Istok nema električnu energiju 8 sati, a živimo u 21. vijeku. Ubijeden sam da postoji alternativa i da postoje alternativni načini snabdijevanja. Ovo su nezvanične informacije, ali kada se obustavi isporuka struje i ljudi koji su navodno došli da rade remont i u momentu tog prekida snabdijevanja pije se kafa itd. Ne vidim razloga zašto se taj navodno remont te naše trafo stanice u Brijesnici Velikoj, a dobio sam od ljudi koji su u struci pozitivno mišljenje, ne bi mogao raditi od 24 do 7 ujutro. Znači nema nikakve prepreke, ako treba da se radi taj remont. Ja sam podnio inicijativu i nadam se da će inicijativa dobiti potrebnu saglasnost kolega općinskih vijećnika. Inicijativa se može u saradnji sa sekretarom Vijeća, odnosno sekretarom Općine, dopuniti i normalno u ime Vijeća potpisat će ju predsjedavajući Općinskog vijeća.“

Emira Karić, predsjednica kluba vijećnika SDP: „Zaista vas srdačno pozdravljam i selamim. Nisam uvijek za onu izreku ko tebe kamenom ti njega kruhom, pa tako i u ovom slučaju. Takođe imala sam jako jako dobrih inicijativa i nalazili ste razloge zašto da ne prihvatite takve inicijative, pa ću vam pokazati da imam i ja neki razum i neku pamet da odbijem vašu inicijativu i da obrazložim zašto odbijam, odnosno klub vijećnika SDP. Uredno smo obaviješteni o nestanku električne energije i smatram da je to u redu. To se događa na cijelom području Bosne i Hercegovine, to će se i događati i mora da se događa budući da takva vrsta infrastrukture nije dobra, stara je, treba ju obnoviti i treba stalno neke radove raditi. Zašto je stara i zašto je neobnovljiva? Samo zato što smo u ovoj državi iz godine u godinu pokradeni, sve se radi na krađi i na krijumčarenju, pa ćemo sve više i dubioznije patiti, jer nismo mi u 21. stoljeću, mi ćemo se vraćati u 20 i 19. stoljeće. Ono što moram priznati je da se ljudi uredno obavijeste. Isto tako niste u pravu kada kažete da oni piju kafu, jer ljudi su zaista radili taj dan. Naravno na nama je da se snalazimo, a i gledali su da je vikend i nedjelja i zato smatram tu inicijativu neopravdanom.“

Semir Halilović, vijećnik SDA: „Poštovani predsjedavajući, zamjeniče, načelniče sa saradnicima, kolege vijećnici i vijećnice, predstavnici medija želim prije svega da vas poselmim i da se uključim i dam doprinos. Nažalost u pripremi ove sjednice ja nisam bio na tom zajedničkom sastanku upravo kada je bila ova inicijativa i žao mi je što nisam znao o čemu se

radi. Želim da dam svoj doprinos kao neko ko je podnosio slične inicijative i na neki način tražio da se od strane Vijeća izvrši pritisak prema isporučiocima električne energije. U tom smislu moram nekoliko stvari da kažem. Prvo je da apsolutno podržavam inicijativu, jer mislim da svaka vrsta pritiska, koja će možda rezultirati na način da će se neko sjetiti da obezbijedi kvalitetniju električnu energiju na području općine Doboj Istok, je prihvatljiva. Mi smo išli, ako sjećate, u smjeru kada smo postavljali pitanje Elektroprivredi za naplatno mjesto, jer se to bilo reduciralo na dva dana ili je bilo poslje 1, više se i ne sjećam. Sada je to dobro regulisano na način da možemo plaćati električnu energiju u pošti, a da naši građani ne plaćaju to kao dodatni trošak. Vi znate da je bila inicijativa prema Elektroprenosu i zato mi je žao što Izet nije pomenuo da će biti ova inicijativa, ali možda još nije kasno. Znači nije dovoljna adresa samo Elektroprivreda, nego i Elektroprenos i ja bih vas podsjetio da su to odvojene firme i da u stvari našu trafo stanicu opslužuje Elektroprivreda, a po svim standardima sve ostale trafo stanice gdje je sa jedne strane 110 kV vod opslužuje Elektroprenos. U tom smislu možda bi i njima trebalo uputiti ovu inicijativu i da Izet tu inicijativu formuliše na taj način. Dakle problem je te trafo stanice i nikada neće biti rješenje bolje i drugo dok ne naprave onako kako je to planirano prostornim planom i kako su oni svojim planovima rekli da je potrebno da se ovdje izgradi prava trafo stanica koja će imati dva dovoda energije sa dvije strane i onda kada dođe do isključenja sa jedne strane, neće vam usfaliti energije sa druge. Trafo stanica koju mi imamo je u stvari trafo stanica za gradilište, ona je pokretna i napravljena je tako da se premiješta sa gradilišta na gradilište. Ona je doduše izuzetno velike snage i nema problema sa tim u vezi, ali remontu se moraju raditi i to će uvijek biti, jer moraju se raditi po zakonu i bolje da se rade nego da strada sve. Tada mora doći do isključenja električne energije i alternative po meni nema prave osim izgradnje te stanice. Oni su imali dva stara voda zbog kojih su izgradili ovu trafo stanicu. Ostao je još jedan koji bi se mogao staviti u upotrebu, ali preko njega apsolutno ne bi moglo doći energije koja nama treba, jer je preusmjeren, koliko ja znam i kakve su moje informacije, kada su napravili našu trafo stanicu oni su iskoristili jedan od ta dva voda da opsluže električnom energijom dio potrošača na području općine Gračanica, čini mi se da je Trgovir zakačen. Trafo stanica u Gračanici ne može podnijeti to da se mi prištekamo. Ja moram ovdje reći da nakon te inicijative koju sam ja podnio načelnik je održao jedan sastanak na koji je i mene pozvao i zaista sam vidio njegovu ogromnu energiju koju ulaže da riješi taj problem. Otvoreno je ljudima rekao šta nije u redu i kako se ophode i ponašaju prema općini Doboj Istok. Da nije tako i da nisam vidio svojim očima ja bih od njega očekivao i rekao njemu daj molim te vidi može li se šta uraditi, ali sam zaista vidio kako ljudima u oči kaže kako treba da postupe da nam riješe problem. Ja se nadam da će doći do nekog rješenja, a ova inicijativa je dobra u smislu što se dodatni pritisak pravi. Najava isključenja električne energije nije dovoljna. Meni je lahko javiti i to ja mogu uvijek, najavite i kažete tri dana nećete imati električne energije. Je li to u redu? Je li u redu ovo o čemu Izet govori da cijela općina ostaje bez električne energije, a sve druge imaju taj sistem normalnih trafo stanica koje se napajaju električnom energijom barem iz dva smjera. To su rasklopna postrojenja koja omogućavaju tu fleksibilnost. Kada god se radi na našoj općini mora se sve isključiti i to je uvijek tako biti dok se ne napravi nova trafo stanica. Nadam se da sam dao doprinos i ako može da ide u smjeru da se dostavi to i Elektroprenosu, jer će oni biti u konačnici oni koji će investirati ovaj projekat. Ja mislim da sam na prošloj inicijativi govorio iskreno, a iz Elektroprivrede jedva čekaju da se riješe tog problema. Ja sam prikupljao informacije kada sam podnosio inicijativu i samo je jedan dio na Grbavici napajan sličnim načinom i to je riješeno, samo je kod nas još ostalo. Nadam se da sam dao neki doprinos.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Kao podnosilac inicijative prihvatam sugestiju kolege vijećnika da se dopis uputi i JP Elektroprenos BiH. Htio sam još reći, a kolega Halilović je rekao na Emirino da smo uredno obaviješteni, ok stoji to, ali ja sebe smatram informatički polupismenim čovjekom i dobio sam to obavještenje, jer te informacije idu preko interneta. Ne znam koliko ima potrošača na području općine Doboj Istok, smatram da je to 3 – 4 hiljade potrošača, uključujući i domaćinstva i poljoprivredu i da pola tih potrošača nisu informatički obrazovani, ali to nije suština toga. Znači došlo je do prekida

napajanja, ok, to je u redu i ja znam da je to tri puta u šest mjeseci i kome je ovo ok neće glasati za ovu inicijativu. Ja znam da ne možemo nešto Bog zna promijeniti, ali ja smatram da mi kao zakonodavna vlast, kao predstavnici naroda ove Općine treba da ukažemo na problematiku koja se dešava na području naše općine i da otvorimo oči onima koji to ne vide. Oni su došli uradili to i to je vjerovatno u skladu sa zakonskim propisima, ali ja govorim o ne snabdijevanju električnom energijom domaćinstava i privrednika općine Doboj Istok. Meni je nepojmljivo da na području čitave općine dođe do prekida snabdijevanjem električnom energijom. U ove sitne detalje ja ne ulazim, alternativa treba i ako budemo šutili vjerovatno će se to nama ponavljati svakih 2 mjeseca ili mjesec i po dana. Treba upozoriti da i mi živimo ovdje, radimo, funkcionišemo i na kraju krajeva i ovi građani i privrednici izdvajaju sredstva za ta javna preduzeća i za isplatu njihovih plaća, doprinosa i svega ostalog. Ništa ovo nije radikalno, niti smo mi u mogućnosti, jednostavno da se uputi dopis da nije u redu i da se nađe alternativna mogućnost napajanja stanovnika i privrede općine Doboj Istok u momentima kada se rade ove stvari.“

Emira Karić, predsjednica kluba vijećnika SDP: „Mislim da vi znate da ja vas razumijem, ali i ja tražim određenu razumnost i tražit ću razumnost kada budu u pitanju neka preduzeća čiji je vlasnik općina, sada će biti i JKP „Čisto“, pa može doći do nekih kuršlusa i to je vrlo moguće s obzirom da znamo u kakvom je stanju. Ja smatram da bi u tim trenutcima trebalo smirivati stanovništvo u smislu da trebamo biti strpljivi dok se nešto ne popravi. Želim da kažem da budu isti aršini za sve i isti odnos. Razumijem vas, ali mislim da se ne ponašate uvijek na isti način u istim okolnostima.“

Dr. Ferid Konjić, predsjedavajući Općinskog vijeća: „ Ovo je blago, mi bi vjerovatno trebali podnijeti tužbu, jer imamo ugovore o isporučivanju električne energije. To je blaga nekakva naša buna. Ovo mi je pozitivna stvar od Ize da krenemo u tom pravcu da onaj ko se obavezuje da treba da ispunjava svoje obaveze. Ko je za ovu inicijativu?

Glasanje: ZA – 14, PROTIV – 0, UZDRŽANIH – 2.

Ova će se inicijativa doraditi, shodno predlagaču da se to uobliči. Ima li još inicijativa i pitanja? Ne vidim prijavljenih.“

USVAJANJE ZAPISNIKA SA PRETHODNE SJEDNICE

Dr. Ferid Konjić, predsjedavajući Općinskog vijeća: „ Dobili ste zapisnik sa prethodne sjednice. Ima li primjedbi?“

Kemal Skopljak, vijećnik BPS: „ Želim samo da skrenem pažnju da ovaj broj prisutnih vijećnika nije tačan. Ovdje nije konstatovano da ja nisam bio na prošloj sjednici Vijeća. Znači nije 14 nego je 13.“

Mehmed Mehinović, predsjednik kluba vijećnika SBiH: „ Selam alejkum i dobar dan svim prisutnima. Naime, kada čovjek ima godina koliko ja imam, a imam ih dosta, najstariji sam čini mi se ovdje i samim tim imam bogato životno iskustvo i sve stvari koje se dešavaju posmatram sa nekoliko aspekata, pa tako i ovo što se desilo u zapisniku sa prošle sjednice Općinskog vijeća gdje stoji odsutni: Senada Džanić, predsjednica kluba vijećnika SBB – LDS, Mehmed Mehinović, predsjednik kluba vijećnika SBiH i Fajik Muratović, vijećnik SDP. Naime, ja sam bio prije 8 sati i nisam čak ni zakasnio i ovo govorim iz razloga nije što će neka finansijska kazna biti, nego da neko kaže vidi nije pročitao ni zapisnik i ne zna se ni braniti, neka se uradi šta hoće. Međutim, mislio sam da ću biti upamćen makar što sam najstariji i što možda najmanje kose imam na glavi, ali eto ni to nije dovoljno, pa zato nemojte haturiti što ću se odsad na svakom Vijeću javljati po

svakoj tački da imam dokaz. Bio sam prisutan na prošloj sjednici i to sam došao prije 8. Želim da se ispravi to.“

Dr. Ferid Konjić, predsjedavajući Općinskog vijeća: „To je tehnička greška, jer svakako ovdje stoji da su odsutni Fajik Muratović, Kemal Skopljak i Senada Džanić, a to je tehnička greška pri kucanju i to će biti ispravljeno.“

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Za ovu sjednicu pored dnevnog reda koji je usvojio Kolegij, imamo prijedlog za proširenje dnevnog reda sa dvije tačke.

U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stavi slijedeća tačka: Razmatranje i usvajanje Prijedloga Odluke kojom se utvrđuje da je od javnog interesa izgradnja pristupnog puta i parking prostora za potrebe JZU Dom zdravlja Doboj Istok i MZ Klokočnica.

Obrazloženje

Razlog za proširenje dnevnog reda je što je potrebno izgraditi pristupni put i parking prostor za JZU Dom zdravlja Doboj Istok - prvenstveno za potrebe hitne pomoći i MZ Klokočnica zbog korištenja njenog puta i uvezivanja sa novim putem, jer ima problema u vezi prevoza bolesnika do hitne pomoći u Klokočnici, ali i zbog rješavanja imovinsko-pravnih odnosa sa suvlasnicima parcela za koje se predlaže potpuna eksproprijacija nekretnina kako bi imali potrebna dokumenta prije početka građevinske sezone.

Ima li potrebu neko nešto da kaže? Ako nema, ko je za da ide tačka na dnevni red?“

Glasanje: ZA – 16, PROTIV – 0, UZDRŽANIH – 0.

To će biti šesta tačka dnevnog reda. Sljedeći prijedlog proširenja je:

U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stavi slijedeća tačka: Razmatranje i usvajanje Prijedloga Odluke o davanju saglasnosti za prekategoriizaciju lokalne ceste Klokočnica – Lukavica – Kapetani u regionalnu cestu.

Obrazloženje:

Razlog za proširenje dnevnog reda je što je potrebno u što kraćem roku dostaviti zahtjev i saglasnost nadležnom ministarstvu kako bi ono do kraja ove godine dalo saglasnost i zatražilo od Vlade Federacije BiH da izvrši prekategoriizaciju gore navedene ceste.

Ima li potrebu neko nešto da kaže? Ako nema, ko je za da ide tačka na dnevni red?“

Glasanje: ZA – 16, PROTIV – 0, UZDRŽANIH – 0.

To će biti sedma tačka dnevnog reda. Na ovaj način imamo 13 tačaka dnevnog reda i dajem na izjašnjavanje. Ko je za cjelokupni dnevni red?

Glasanje: ZA – 16, PROTIV – 0, UZDRŽANIH – 0.

Usvojen je sljedeći:

DNEVNI RED

1. *Razmatranje i usvajanje prijedloga Rebalansa Budžeta općine Doboj Istok za 2019. godinu,*
2. *Razmatranje i usvajanje prijedloga Budžeta općine Doboj Istok za 2020. godinu,*
3. *Razmatranje i usvajanje prijedloga Odluke o izvršenju Budžeta općine Doboj Istok za 2020. godinu,*
4. *Razmatranje i usvajanje prijedloga Odluke o uspostavljanju i održavanju zona zaštite i mjerama zaštite područja izvorišta za snabdijevanje vodom sa bunara BK-2/NB-2 u naselju Klokotnica i bunara EB-1 u naselju Brijesnica Velika, općina Doboj Istok,*
5. *Razmatranje i usvajanje prijedloga Odluke o agrotehničkim mjerama zaštite i korištenja poljoprivrednog zemljišta na području općine Doboj Istok,*
6. *Razmatranje i usvajanje prijedloga Odluke kojom se utvrđuje da je od javnog interesa izgradnja pristupnog puta i parking prostora za potrebe JZU Dom zdravlja Doboj Istok i MZ Klokotnica,*
7. *Razmatranje i usvajanje prijedloga Odluke o davanju saglasnosti za prekategorizaciju lokalne ceste Klokotnica – Lukavica – Kapetani u regionalnu cestu,*
8. *Razmatranje i usvajanje prijedloga Rješenja o konačnom imenovanju člana Upravnog odbora JU Centar za socijalni rad Doboj Istok,*
9. *Razmatranje i usvajanje prijedloga Rješenja o prijedlogu za imenovanje članova Nadzornog odbora JKP „Čisto“ doo Doboj Istok,*
10. *Razmatranje i usvajanje prijedloga Programa rada Općinskog vijeća za 2020. godinu,*
11. *Razmatranje i usvajanje Programa rada Općinskog načelnika za 2020. godinu,*
12. *Razmatranje i usvajanje Izvještaja o ostvarenju godišnjeg plana implementacije strategije integriranog razvoja Općine Doboj Istok za 2018. godinu,*
13. *Razmatranje i usvajanje Informacije o provedenim aktivnostima povodom obilježavanja Dana državnosti BiH.*

REALIZACIJA DNEVNOG REDA

Ad. 1. Razmatranje i usvajanje prijedloga Rebalansa Budžeta općine Doboj Istok za 2019. godinu.

Dr. Ferid Konjić, predsjedavajući Općinskog vijeća: „ Materijal ste dobili, stav Komisije ste dobili, tačku dajem na diskusiju.“

Emira Karić, predsjednica kluba vijećnika SDP: „ Budući da nije u praksi, ali mislim da bi bilo dobro da možda načelnik ili neko iz službe da neki uvodni govor, jer ovo nije transparentno, ovo nije razumljivo, pa bi skratili diskusiju ili komentare ili pitanja. Vidim da je mogla tačka proći da iko o njoj prodiskutuje, pa sam se u zadnji trenutak javila. Idem redom i tražim objašnjenja. Suficit prikazan, na šta se tačno odnosi, gdje se pojavio i gdje se prosljeđuje? Ja sam pokušala, uzela sam kalkulator, pa da vidim minus i plus i nije mi se nešto slagalo, ali da idem ponovo, nije mi padalo napamet. Teško je na par dana uzeti ovaj rebalans i pojasniti ga sam sebi, pa tražim pojašnjenje od struke. Vidimo nije potrošeno troškovi smještaja, putovanja u zemlji, tu je minus 890, takođe se pojavljuju troškovi dnevnica u zemlji i to razumijem, minus 900 nešto pozitivno, troškovi prevoza u inostranstvo javnim sredstvima minus 1500, pozitivno, troškovi smještaja, znači načelnik nam je pokazao da nije troškali i rastrošan. To je pozitivno u svakom slučaju, ali da li se to sada iz nekih drugih stavki vadi, to je pitanje. Takođe, zašto nije potrošena usluga opravki i održavanja zgrada, odnosno šta je to planirano 26.000, a nije utrošena 21.000? Je li to nije dobro planirano ili neki vremenski rok nije bio dovoljan? Nije mi jasno i imam pravo da mi se razjasni. Takođe, ostale nepomenute usluge i dadžbine plus 20.000, pa imamo kabinet općinskog načelnika, znači ukupno 50.000. Šta, gdje, kako? Da li je moguće da nam razjasnite? Takođe služba za civilnu zaštitu, planirano je 10.000, potrošeno još 25.000, ukupno 35.000 i da vidimo šta je to planirano, odnosno šta nije planirano, a utrošeno je. Ostali grantovi pojedincima

od 1.500 na 11.000, znači 9.500 u rebalansu imamo više. Zašto se stvorila tolika razlika? Može li i za to pojašnjenje? Subvencija javnim komunalnim preduzećima, znači subvencija je planirana 60.000 i znam da to ide svake budžetske godine, ali evo imamo još 15.000 u plusu, odnosno ukupno 75.000 ima subvencija „Čistu“ za odvoz smeća, vjerovatno poskupljenje, ne znam. Podsticaji projektima u poljoprivredi, ja to podržavam, ali je isto otišlo u plus 5.000. Zašto je i tu došlo do određene razlike? Takođe me zanima naknada – renta, 90.000 je planirano, a nije naplaćeno 34.000 neke rente i meni nije jasno kako trećina nije naplaćena ako je rebalans 15.12. Ne slažu se neke stvari matematički. Ostali objekti – kabinet općinskog načelnika, zašto tu nije potrošeno 150.000 i šta je to planirano za 150.000? Šta je planirano na objektima vodovoda i kanalizacije 200.000, a utrošeno je 6.500? Takođe nagrade učenicima 4.000, ja znam da učenici dobivaju samo ono vezano za nagrade 50 KM i da li se još učenik generacije primi, to ne znam, ali ne znam da li su se 4.000 utrošile.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih. Ko će odgovoriti, načelnik ili pomoćnik? Treba dati pojašnjenje zašto je rebalans po ovim konkretnim pitanjima.“

Kemal Bratić, općinski načelnik: „Ja bih vas sve poselamio uvažene vijećnice i vijećnici. Da nije tako kao što jest, ne bi radili rebalans. Ovdje ima ljudi koji dosta toga znaju i o budžetima i o finansijama i naravno ukoliko se pojavi na nekoj stavci višak, odnosno manjak radi se rebalans. Po meni ovdje je sve jasno ko je htio da čita. Ko nije naravno i evo da damo dodatna pojašnjenja njemu neće biti jasno, jer neće htjeti da bude jasno. Narednu tačku imamo budžet za 2020. godinu i na jednoj strani je plan, a na drugoj strani ono šta smo ostvarili. Ja bih najviše volio kada bi sve bilo kako smo planirali i tako da u jednu decimalu bude i ostvareno. Nažalost, vi znate 2018. godine kakva su bila turbulentna politička dešavanja i nije nikakvo čudo da se određene stavke koje su planirane nisu utrošile, odnosno da nismo mogli doći do određenog dijela sredstava. Ja se nadam da će 2020. godina biti dosta uspješnija i dosta bolja. Vama za informaciju juče sam potpisao ugovor o prenosu sredstava koje će se voditi u 2020. godini, a završili smo ga u 2019. godini, a vrijednost je od 230.000 KM za izradu kolektora od Prihvatnog centra Duje do kanalizacije do Gnječa, odnosno do rijeke. Završili smo proceduru javnih nabavki, izabran je izvođač radova, ali nismo uspjeli realizovati u toku ove 2019. godine i on se samim tim prenosi u 2020. godinu. Takvih je niz stvari koje se dešavaju, a ne samo ove godine, nego i prethodnih, a i dalje će se dešavati i ko god bude sjedio ovdje u Vijeću i ko god da bude općinski načelnik. Sve je tamo jasno prikazano i ne bih se složio da nije transparentno. Logika govori ukoliko smo imali za nekakva putovanja i smještaj 1.000 i ako smo potrošili 100 KM, to je minus 900 KM. Onaj ko je htio da čita vidio je i ko hoće da mu bude jasno.“

Emira Karić, predsjednica kluba vijećnika SDP: „Apsolutno niste ništa odgovorili. Ja imam neke mogućnosti koje ću itekako da koristim u narednom periodu. Sva ova pitanja o rebalansu budžeta ja ću postaviti kao vijećničko pitanje, jer smatram da će predsjedavajući biti korektan i da će tražiti odgovore na sva ova vijećnička pitanja, pa ćemo se, što bi se reklo, ganjati malo. Nije sve transparentno. Evo ja da sada dam neku nagradnu igru, postat ću malo smiješna, po 10.000 KM svakom ko bude znao šta je ovo, zašto je plus, a zašto je minus od nas vijećnika, ne bih bila u minusu u toj nagradnoj igri. Svaka čast Selmin se u ove stvari razumije, ja to znam, ali razumije i da se složi da se nešto netransparentno tako pokaže. Šta je problem reći i odgovoriti? Zašto je planirano za neko zemljište? Koje je to zemljište trebalo biti? Rebalans je novina, gospodine načelniče, u našoj općini. Do sada ga nije bilo, do prošle ili pretprošle godine. Mi smo ovo i tražili da vidimo plus, minus itd. i da nam bude jasno. Vi ste u četiri godine mandata radili i bilo je i pluseva i minusa, ali nije rebalansa bilo, jer ste rekli da nije potrebno, da nije zakonski itd. Ništa, ostaju mi vijećnička pitanja kao jedina forma koju, hajmo reći, treba da ispoštujete.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za ovaj Rebalans?“

Glasanje: ZA – 10, PROTIV – 0, UZDRŽANIH – 6.

Ad.2. Razmatranje i usvajanje prijedloga Budžeta općine Doboj Istok za 2020. godinu.

Dr. Ferid Konjić, predsjedavajući Općinskog vijeća: „Materijal ste dobili, dobili ste i stav Komisije, a imamo i amandmane, tačku dajem na diskusiju.“

Emira Karić, predsjednica kluba vijećnika SDP: „ Samo podsjećanje, a kasnije će biti diskusija. Gospodine predsjedavajući, prvo se moramo izjasniti oko amandmana i ako treba da nađemo taj član Poslovnika o radu da prvo ide izjašnjavanje o amandmanima.“

Dr. Ferid Konjić, predsjedavajući Općinskog vijeća: „Ima li još diskutantata? Ne vidim prijavljenih diskutantata. Predlagač će se izjasniti o amandmanima, a onda ćemo se mi izjašnjavati o tome. Htio sam da se prvo izdiskutuje, pa da uokvirimo sve.“

Kemal Bratić, općinski načelnik: „ Nakon provedene javne rasprave, ne znam ko je od vas bio prisutan, ali ono što sam ja dobio u pisanoj formi jeste da su jedine zamjerke bile da se uvrsti Udruženje penzionera u budžet sa određenim iznosom i Udruženje građana „Lipe“ isto sa određenim iznosom. Smatrao sam da je veći prioritet da Udruženje penzionera ubacimo u budžet prvi puta u ovoj godini radi principijelnosti, jer smo odbili neka druga udruženja koja su tražila i odlučio sam se da ne ugradim direktno u budžet tu stavku kada su u pitanju „Lipe“. Naravno mi ćemo njima pomoći na drugi način, jer postoje i drugi načini da im pomognemo. Ono što ja znam i što je došlo do mene da su amandmani dostavljeni samo od Općinskog odbora SDP Doboj Istok. Amandman broj 1. je da se Udruženju žena poveća iznos od 1.000 KM, a da se taj iznos uzme sa konta Izborne komisije. Svako onaj ko zna da je zakonom propisan određen iznos, što bi rekli u fening, koji dodjeljujemo Izornoj komisiji kada je izborna godina, odnosno kada nije izborna godina. Ko god je ovo pisao to vjerovatno nije znao i na taj način promašio, jer ne možemo i ne smijemo u skladu sa zakonom dirati taj iznos Izborne komisije, jer kao što znate iduće godine su općinski izbori i sav teret finansiranja provođenja izbora spada na općinu Doboj Istok, koji će se naravno provesti i ovdje kod nas. Tako da je taj prvi amandman za mene neprihvatljiv. Amandman 2. Predlažem da se iz općinskog budžeta izdvoji 2.500 ili 25.000, po nulama je 25.000 i ko god je pisao vjerovatno nije neki matematičar. Za kupovinu namještaja 25.000, ja ne znam koji je to namještaj 25.000 KM i da se on skine sa budžetske pozicije – budžetska rezerva. Mišljenja sam da nije nikakav problem ukoliko iznađemo mogućnost da pomognemo, ali da brigu konačno na području općine Doboj Istok o svim školskim objektima treba da preuzme Ministarstvo obrazovanja, tako da ni ovaj amandman za mene nije prihvatljiv, pogotovo ovaj iznos za namještaj 25.000 KM.“

Emira Karić, predsjednica kluba vijećnika SDP: „ Tehnička greška, dogodila se i u zapisniku.“

Kemal Bratić, općinski načelnik: „Predsjedavajući, ja bih zamolio da me ne prekidaju, jer ja svakoga pažljivo slušam i nikoga ne prekidam. Ja prihvatam da je tehnička greška. Treći amandman također od SDP, svi amandmani su od strane SDP. Predlažem da se konto organizacione jedinice 614323 – tekući transfer parlamentarnih političkih stranaka uveća ... i ja sam tu stao, nisam dalje ni čitao. Ja nisam za to da se bilo koji transfer, bilo koje političke stranke uvećava. To po meni ne bi bilo korektno i ja za to nisam, ali ako je Vijeće za to vi slobodno to izglasajte. Ja za povećanje izdvajanja političkim strankama nisam i neću nikada biti dok se išta pitam. Tako da je ovaj amandman meni također ne prihvatljiv. Ima još jedan amandman – poljoprivredna proizvodnja da se razdvoji – podsticaji poljoprivrednoj proizvodnji 10.000 i podsticaj žena u poljoprivrednoj proizvodnji. Kako to uraditi? Mi imamo sada, ako niste vidjeli u novom budžetu dvije stavke. Na jednoj 15.000, a na drugoj je 20.000 KM za podsticaje. U

dosadašnjim podsticajima mi smo davali i ženama, ali kako da razdvojimo i po meni to ne bi bilo korektno prema ovoj brojnoj, da kažem, populaciji, mada se često pitam da li je ona brojnija. Tako da ni ovaj amandman nije u redu. Mi smo i ove godine dali za podsticaje, čini mi se, negdje blizu 40.000 KM. Prvi dio je bio izdvajanje podsticaja za plastenike, a drugi dio je bio za izdvajanje 23 i nešto hiljada KM za muzna grla. Tako ćemo, ako Bog da, i iduće godine i niko ni jednoj ženi neće zabraniti. Imali smo i pčelare, znači tri grane smo imali podsticaja u našoj poljoprivrednoj proizvodnji i smatram da iz godine u godinu to trebamo pojačavati i ne možemo izdavajati sada za poljoprivredu ženama, jer bi to bilo ružno. Ja bih prihvatio amandman da je to neki ljepši prijedlog, da žene nešto ljepše rade, a ne baš za poljoprivredu, za mene to malo ružno zvuči. Tako da uvažene vijećnice i vijećnici ni jedan ovaj amandman koji je dostavljen, a ima malo neozbiljnih, ima ne znam kako bi ih nazvao, za mene kao predlagača nije prihvatljiv.“

Emira Karić, predsjednica kluba vijećnika SDP: „Krenut ću prvo od javne rasprave. Mi nismo dobili poziv na javnu raspravu, ne znam zbog čega, jer obično dobijemo putem mejla, a nekada budemo i telefonski obaviješteni. Ovaj puta nismo, a ja sam do sada uvijek bila na javnoj raspravi da onako iz svoje perspektive vidim i čujem šta se događa. Kažete nije bilo nekih spornih momenata na toj javnoj raspravi, nije bilo potrebe da ljudi dolaze i ne radi se o tome, jer vi ste, gospodine načelnice u velikoj zabludi. Ja smatram, možda će biti grubo, pa donekle i diktatorskim sistemom općine Doboj Istok, pa tako ljudi kada sebi zamisle da imaju neku dobru ideju znaju da nisu podobni, da nisu u tome što neko želi da budu, onda oni nemaju potrebe se zamarati i dolaziti i izdavajati svoje slobodno vrijeme dolazeći na javnu raspravu. To je opšte poznata stvar. Ljudi na ulici sliježu ramenima i kažu znamo mi, kao i sama vijećnica Emira Karić, ne može ni slovo ni zarez da prođe. Pišem amandmane, pa se nekada sama sebi smijem, da pretvorimo malo diskusiju u neku šalu. Radi se o tehničkoj grešci, zaista nisam ni pregledala taj amandman, kucao je moj sekretar, da ga nazovem tako. Naravno treba uvijek pregledati i ne treba vjerovati kada daješ ljudima da ti odrađuju posao. Slažem se i izvinjavam, ne radi se o 25.000 nego o 2.500 i ja sam obrazložila da su ostale dvije učionice rekonstruisane. Divno zdanje smo dobili u Brijesnici Maloj, a teško se donacije dobivaju i ja sama učestvujem u tome i 50 sam nekakvih zahtjeva poslala i privrednicima, pa mogu reći da stiglo samo 1.000 KM do sada. Našla sam mogućnost da makar drugu učionicu obezbijedi Općina. To preko Izborne komisije, to je stvarno bila šala, znam ja šta je zakonska obaveza, samo malo je previše obzirom da vijećnici dobivaju oko 80.000, a 17 vijećnika mislim da je neko i nešto na ovoj općini Doboj Istok za razliku od Općinske izborne komisije kojoj su samo 24 sata bitna kada su lokalni izbori i 24 sata kada su federalni, odnosno parlamentarni izbori. Zato sam tu šalu napravila da im se malo skine. Ne znam jesmo li mi donijeli odluku o tolikom izdvajanju. Sarajevo donijelo, svaka im čast i treba tako. Što se tiče mog amandmana za podsticaje, ne znam da li ste ikada bili, načelnice, na tim sastancima ili nečem sličnom za prava žena i često sam čula da se trebamo boriti za taj gender senzitivni budžet. Mislim da je i ovdje bio neki sastanak, neki seminar, gdje je nama rečeno da se zaista borimo da gender senzitivni budžet i ja gdje god vidim priliku da mogu skrenuti pažnju na slabiji pol, mada ne uvijek, iskoristit ću tu priliku. Naravno ne možete vi to zacementirati ukoliko nema žena za 5.000 KM, ali neka one znaju da u budžetu postoji 5.000 KM gdje one mogu aplicirati. To je zaista zdrava i dobra namjera, međutim ja se ne bojim ići će to i iduće godine, kao i penzioneri. Pensioneri su bili moj amandman 3 godine i kada sam vidjela rekla sam super ne moram ove godine za penzionere. Vi ćete iduće godine staviti kao prijedlog svoj, a ne kao moj amandman i ja nemam ništa protiv toga, jer ja sam uvijek za korist i ono što je dobro na ovoj Općini.“

Hasan Hasančević, predasjednik kluba vijećnika SDA: „Pošto prvi puta izlazim sve vas selamim. Zamolio bih kolegicu što se tiče diktature, načelnik pripada političkoj opciji koja je prekinula diktaturu proleterijata na području bivše Jugoslavije. Tako da znate i ako hoćete da politiziramo i da ulazimo u rasprave na budžetu ko je diktator, ko nije, otići ćemo daleko i trebat će nam 3 dana.“

Emira Karić, predsjednica kluba vijećnika SDP: „Riječ diktatura postoji u riječniku stranih riječi i ona nije riječ koja je pogrdna. Nije joj lijepo značenje, ali ne znači neku psovku da bi ja dobila neku opomenu po Kodeksu ponašanja. Ja imam pravo da mislim da li neko sprovodi neku vrstu diktature, a vi imate pravo da mislite da je prije bila diktatura i moramo rasčistiti sa time. Ja sam jednim imenom to nazvala, ali ne mogu sada da trošim vrijeme da vi imate ovdje samo te podobne i kada vam ko prilazi, molim vas hoćete li, da može, ali glasat ćeš tako. To je ta priča koja se svodi da neće ona još dugo trajati. Ne može ovaj sistem na taj način ili će se sve obrušiti ili će se promijeniti nešto u našoj državi. Govorim o tome da se sve svodi da li si u tom taboru ili nisi u tom taboru i to je jasno i vi to znate. Ja vam samo mogu preporučiti, nemojte u budućnosti, pokušajte blaže da dođete do izbora, a ne samo usluge, naknade itd.“

Dr. Ferid Konjić, predsjedavajući Općinskog vijeća: „Tačka dnevnog reda je Budžet općine Doboj Istok, a mi pričamo o izborima i o nekim stvarima.“

Kemal Bratić, općinski načelnik: „Zamolio bih da uvažena vijećnica više priča o tački, a ne o meni. Zahvalio bih se na komplimentima, jer ako je neko to što ste vi pomenuli takav kakav jeste onda je to naučio od vaše političke partije, a svi mi znamo šta se i kako radi. Ja ću se osvrnuti na budžet i na ono što je najbitnije na prihode i primitke koje smo planirali tokom 2020. godine. Ne mogu da ne kažem da je na javnoj raspravi traženo da se uvrste penzioneri i nije to načelnik sam, jer da nisu tražili ja ne bih i nije to ispolitizirano. Tako da sam ja usvojio njihov prijedlog, ali nisam usvojio prijedlog u potpunosti, jer su tražili 5.000, a ja sam predložio da to bude 1.000 KM. Iz budžetske rezerve sam im ove godine izdvojio 1.000 KM za pomoć 20 penzionera kojima su penzije one minimalne. Nisam znao da neki imaju 100 i nešto KM penzije, tako da će za ta sredstva koja budu dodjeljivana iz budžeta Udruženje penzionera biti dužno da da povratnu informaciju kome su to dodijelili, naravno sa potpisima korisnika koji su to dobili. Ja ću se osvrnuti na prihode i primitke. Naravno drago mi je da su određene stavke kako od indirektnih poreza tako i od potpore koju smo planirali, kao i porez na dohodak, što je najbitnije, da se iz mjeseca u mjesec konstantno povećavaju, a da ne govorimo iz godine u godinu. Tako da je za ovu godinu planirano 725.371 KM, porez na imovinu 224.000, indirektni porezi imaju blagi porast za nekih 25 - 30.000 KM u odnosu na prethodnu godinu, pa iznose 1.228.426 KM, neporeski prihodi 584.000 i potpora koja je planirana od viših nivoa vlasti koja iznosi 1.180.000 KM i naravno ukupno to iznosi 3.961.796 KM. Kada se radi o rashodima koji su planirani budžetska rezerva, zatim bruto plaće 784.095 ili 21,5 %, naknade troškova zaposlenih 94.000 ili 2,6 %, doprinosi na teret poslodavca 88.000 ili 2,4 %. Kako se vidi u odnosu na budžet ispod 30% ide za naknade uposlenih i njihove bruto plaće. Izdaci za materijal i usluge 630.000, zatim tekući grantovi 801.350 KM, kapitalni izdaci 1.150.000 KM, kapitalni transferi 22.000 KM. Veći dio ovoga je regulisan zakonom da li su to viši nivoi ili su to odluke Općinskog vijeća, odnosno kantonalni ili federalni ili državni zakoni kao što je i ovaj o izbornoj komisiji. Naknade za topli obrok su planirane za jedan radni dan 1% i regres je 450 KM. Ja sam potpisao sa sindikatom i osnova za ovu godinu će biti 310 KM i bit će to jedno blago povećanje od 2019. u odnosu na 2020. godinu nešto preko 20.000 KM tako da to nije puno. Ono što je najbitnije jeste da smo mi na vrijeme usvojili i postupili onako kako je to zakon naložio. Mi smo to uradili 2013. godine i uskladili koeficijente po federalnom zakonu i sada kompletan Kanton ima problem sa usklađivanjem koeficijenata po onome šta smo mi uradili. Evo da vas izvijestim završena je presuda po prvom slučaju uposlenika, ne bih imenovao nikog od njih, i Općina Doboj Istok je u većini stavki po kojim su nas tužili dobila spor. Čini mi se da ćemo samo po stavci regres i jedan dio razlike toplog obroka morati platiti za ono što su nas radnici, ne nas nego općinu Doboj Istok tužili. Za koeficijente, za plaće izgubili su, presuda je izvršna i mi smo planirali u budžetu da odmah na početku iduće godine da to isplatimo. Tako da je i to jedna dobra i radosna vijest, a vidjeli ste da smo planirali za ove sudske sporove i da imamo stavku koju moramo planirati. Da li ćemo je potrošiti ne znamo, isto kao i druge stavke za koje su neki vijećnici pitali. Ponavljam najviše me raduje povećanje stavke poreza na dohodak i indirektni porezi. Po projekciji ministarstva indirektni porezi će stalno rasti i najbitnija činjenica je da je pokrenuta inicijativa i

da će, ako Bog da, ići u dobrom pravcu da se postepeno promijeni raspodjela od indirektnih poreza tako da će se raspakovati ova stvar koja je, po meni i po svim građanima Tuzlanskog kantona, nepravedna da Sarajevo ima kvotu 2, a mi imamo kvotu 1, da se nakon lijeganja sredstava od indirektnih poreza vrate dugovi, pa se daje Federaciji, pa kantonima, pa onda šta ostane općinama. Tako da će u narednom periodu i po tim stvarima biti određena povećanja kada se radi o ovoj stavci indirektni porezi.“

Emira Karić, predsjednica kluba vijećnika SDP: „Mene takođe raduju dvije stavke, mislila sam da ću dobiti pojašnjenje, ali nisam, a to je nabavka zemljišta, šuma i višegodišnjih zasada pod tom je pozicijom 100.000 KM i nabavka građevina 500.000 KM. Znači planirano je, a ne znam zaista o čemu se radi, pa ako nije problem, načelnice, da izađete i da to pojasnite. Kada je u pitanju Udruženje penzionera, meni je jako drago što su oni ušli i ponovo se vraćam na njih. Inače svaki načelnik, premijer ili nešto slično treba da bude usmjerivač ka jačanju udruženja građana, kao i mi ostali. Da li se neko složio ili ne udruženja građana su korektori ovog društva i jedini koji nas mogu u budućnosti možda ispraviti. Nekada su podobni, ali često imaju svoj glas i svoje mišljenje i zato smatram da što više udruženja građana to bolje društvo. Bez obzira ko je u tom udruženju, dolazi ipak do određenih sastanaka, dolazi se do određenih zaključaka i ostat ću na tome da su oni jedini do sada korektori društva. Takođe pojašnjenje za Udruženje građana Dobrovoljno vatrogasno društvo ovdje je planirano 10.000. Da li je to planirano za neku dodatnu opremu ili određene intervencije? Ja bih voljela znati dokle je došlo to Dobrovoljno vatrogasno društvo iz razloga što me to vraća u neku moju mladost. Ja sam bila 10 godina pripadnik Dobrovoljnog vatrogasnog društva i stekla zvanje vatrogasnog podoficira i znam otprilike kako to ide. To je udruženje koje treba, bez obzira iz koje grupacije dolazimo, jačati i u školi promovisati, srednjoj pogotovo, jer tu su danas sutra punoljetne osobe, imati neki program promovisanja. Ja sam očekivala komisiju načelnice, kao prijedlog kao što smo se dogovorili na Kolegiju, ali izgleda da ste to zaboravili. Ne znam pod kojom tačkom da to uvrstite, možda plan rada načelnika, možda ste tu planirali. Komisija za programe za obilježavanje značajnijih datuma o tome smo nešto na Kolegiju razgovarali. Kažete da niste pobornik da se političkim strankama bilo šta izdvaja, pa donekle ste i u pravu. Stranke koje su u opoziciji i nemaju odakle drugo osim iz vlastitih prihoda finansirati. Ja takođe nisam, ne da nisam nego je protuustavno finansiranje vjerskih zajednica. Znači u našoj državi vjera i država su odvojene i ovih 3.200 ne kažem da ne treba, ali nisam pobornik finansiranja iz državnog budžeta, jer su po Ustavu država i vjera odvojene. Ja citiram Ustav i nisam ništa drugo, jer oni se isključivo trebaju finansirati od džematlija.“

Mehmed Mehinović, predsjednik kluba vijećnika SBiH: „Naravno meni je poznato da ko drži banku, on drži pravila igre i on određuje pravila kako će se igrati. Isto tako mi je jasno ko ima vlast, ko ima većinu on određuje budžet i kreira ga onako kako misli da je najbolje i kako će najbolje realizovati neke svoje vizije i ispuniti ono za šta je zadužen u svojoj misiji. To mi je jasno, takva su pravila i političke igre u našem društvu i ja to uvažavam, zaista uvažavam. Međutim stvar je onih ljudi koji nisu u vlasti i koji nisu ni blizu te vlasti da kritikuju i da iznalaze neka rješenja da sugerišu, ne zlonamjerno, nego dobronamjerno ako se može šta ispraviti, ako šta nije u redu da se pokuša ubijediti vlast da to ispravi. Naime, kada govorimo o budžetu, neću govoriti šta je budžet, uvijek mi imamo šta pričati i ne može biti ni po čijoj volji da kažemo to je onako kako sam ja zamislio. Znam da nije ni po onome ko je ga kreirao, jer uvijek ima raznih zahtjeva, a sve želje se ne mogu ispuniti. Međutim šta je dobro? Ja uvijek polazim od onoga šta je dobro. Dobro je da će općina Doboj Istok i ovo Vijeće usvojiti budžet u tekućoj godini za narednu godinu što šalje dobru sliku u svijet i međunarodnim organizacijama da vodimo računa o tome. Može se donijeti odluka, međutim to nije to kao kada se usvoji budžet. Mi ga usvajamo i to je stvarno dobro, neko se potrudio da napravi prijedlog i da provede proceduru javne rasprave i ja to cijenim. Šta se može još reći da je dobro? Da je u apsolutnom iznosu od 740.000 KM ili oko 20 % predložen veći budžet u odnosu na rebalans budžeta koji je malo prije usvojen. To je isto dobro, znači optimistički je napravljen, očekuju se dodatni prihodi i kada se analizira da li će biti realni

ili neće, ali čovjek napravi taj plan, pa vidjet ćemo kako će se taj plan ostvariti. Drugo što je meni fascinantno, a ne mogu biti nečovjek da to ne kažem, a to je da je u strukturi prihoda, nikada nisam ulazio u detalje električna energija, troškovi goriva itd. da se Bogdom i više potroši nego što je planirano, ali da se ostvare rezultati koji će biti bolji. Prihod od poreza je 2.178.000 učestvuje sa 55% u ukupnim prihodima što daje garanciju da budžet može biti stabilan. 584.000 ili 15% je direktnih poreza i to su oni porezi u kojim općina direktno učestvuje i to kad se sve sabere je otprilike 70 % što je po meni dobro i garancija neke opstojnosti. Tih 70 % pokriva otprilike one izdatke koje finansira općina, a to su bruto plaće i troškovi zaposlenih, to su izdaci za materijal, sitan inventar i usluge, to su tekući tranferi i budžetska rezerva. Ovih 1.100.000 ili 30 % prihoda koji se očekuju od kapitalnih primitaka od viših nivoa vlasti to je nama garancija da će se neki kapitalni projekti realizovati koji trebaju. Mislim da je i ovo jako dobro i ambiciozno napravljeno. Ne sumnjam ja da će biti i više ili možda i manje, međutim to je ono što će biti raspoređeno u te kapitalne izdatke i bit će to veliki posao za menadžment i čitav izvršni organ općine da realizuje to što je planirano. Želim im ja puno sreće u tom dijelu i ako Bog da, svi ćemo koristiti te blagodati ako taj 1.100.000 dođe ovdje. To je ono što se tiče prihoda i ja sam stvarno zadovoljan. Ono što se meni ne sviđa, ja ne sumnjam u ljude koji su kreirali budžet da to znaju kao i ja što znam, a to je da vi znate kada se nešto planira i neću reći da je ovo planirano napamet, planirano je na osnovu nečega i vijećnicima je trebalo biti predloženo na osnovu čega je planirano. Je li to na osnovu devetomjesečnog ostvarenja budžeta za prošlu godinu, odnosno za tekuću godinu? Je li to na osnovu plana za prošlu godinu? Je li to po procjeni ostvarenja za čitavu ovu godinu? Moralo je biti da bi mi, kao što je i Emira prije mene diskutovala, mogli argumentovano reći je li to bilo povećanje, pa da tražim neka pojašnjenja. Stvarno je trebalo biti finansijski virtuoz i umjetnik da bi sve ovo složio. Ja sam uspio da to sve obračunam, međutim to je ono što ja stalno kritikujem moralo je biti uporednih pokazatelja. Može me gledati kako god ko hoće, ali morao je biti uporedni pokazatelj. Je li to devetomjesečno stanje i da svi možemo uporediti kakva su odstupanja, gdje su odstupanja, gdje su povećanja i da pohvalimo povećanja ili da kritikujemo i da nam se objasni zbog čega je planirano ili nije planirano. Ja nikada neću to prihvatiti da nema te tabele koja upoređuje planirani budžet sa nekim od ostvarenja ili eventualno sa planom za prošlu godinu. Nije mi jasno da imamo budžetsku rezervu koja je jako dobro koncipirana i manje nego što je planirano i o njoj se podnosi izvještaj Općinskom vijeću gdje je potrošena budžetska rezerva, ali na drugoj strani čitam da ima preko 90, odnosno nešto malo manje od 100.000 neplanirani nepredviđeni troškovi. Šta su ti nepredviđeni troškovi i usluge? Da se oni objasne da znamo šta je to. Podnosi se izvještaj za manji iznos budžetske rezerve za koju ja uvijek kažem da treba biti i veća, a imaju i nepomenute usluge i dadžbine koje su 100.000 i njih ne treba objasniti. Nije mi jasno nikako i mislim da treba vijećnicima opozicije i pozicije i bilo bi to sasvim drugačije, jer volio bih dignuti ruku za ovakav budžet. Volio bih zbog strukture prihoda koji su planirani, ali ne mogu zbog nekih principa i kada razgovaram sa svojim kolegom Safetom i analiziramo sve to zajednički da nema ovih elemenata o kojima ja pričam i ako je to 500.000 građevinskih usluga i da ne trebaju vijećnici znati šta je to planirano u tih 500.000 i u dvije rečenice da se sroči. Da ja mogu reći ljudi planirali su i mi smo donijeli takvu odluku i planirali smo uraditi to, uraditi to, pa kanalizacija, pa gdje se ta kanalizacija planirala raditi i šta je planirano raditi, a nemamo nekakvih elemenata. Ko god kaže da je transparentno, jeste transparentno i zakonito, ali ispravno nije, jer moralo je biti objašnjenje. Nemojte se ljutiti, ovo nije ništa zlonamjerno, ja volim općinu kao što je voli i pozicija i želim da ovo radi kako treba. Neko će reći zašto diskutuješ, a nisi stavio amandmane, jer znam da ne pije vode. Dobio sam informaciju od ljudi iz vlasti nemoj stavljati džaba da ti se smiju, neće ti ništa proći. Iz tih razloga, a imao sam i ja nekih amandmana, ali sam kao opozicija dobronamjerna htio da kažem šta nedostaje ovom budžetu iako je on strukturalno jako lijepo postavljen. Na kraju da kažem da klub Stranke za BiH, iz ovih razloga koje sam gore nabrojao, neće podržati ovakav budžet.“

Kemal Bratić, općinski načelnik: „ Ja bih se prije svega onima koji pohvaljuju ovakav budžet želio zahvaliti, ali i onima koji kritikuju jer će nam to biti smjernica za nekakav budući rad i da otklonimo nedostatke koje je neko vidio, jer ih mi možda nismo vidjeli. Prije svega krenut ću od

ove zadnje, nemoguće je jer je novi softver za budžet, a i meni bi bilo lakše da imamo uporedbu po kolonama 18 – 19 ili planirano – ostvareno. Ovo je novi softver i nismo mi to izmislili i tu je pomoćnik za finansije, jer se i meni bilo lakše snalaziti, pogotovo što nisam te struke kada se radi o tome. Nemojte da se dovodimo u zabludu kod ovih planiranih stavki. Nabavka zgrada – mi moramo imati konto koji se zove nabavka zgrada. Šta ćemo mi raditi? Nemojte da vam sada ja kažem svoj plan šta ću uraditi, pa se nešto ne ostvari. Ko bi to rekao od vas? Svi koji ste diskutovali za govornicom, bi li tako uradili? Ja imam određen plan, imam određena obećanja. Ja vas molim uvažena vijećnice da ne dobacujete. Ako ja vama budem dobacivao nećete moći izaći za govornicu. Nemate vi potrebe mene usmjeravati i ako želite da me isprovocirate, nećete uspjeti. Nabavka zgrada – samo ću napomenuti neke, imamo zahtjev MZ Lukavica Rijeka u kojem traži izgradnju zgrade ambulante, školu smo završili i stavili tačku, imamo još grijanje uraditi, Mala Brijesnica je tražila da počnemo da gradimo sportsku dvoranu, pa tribine u Velikoj Brijesnici i tribine u Klokotnici da se natkrijevaju. Sve je to ako nađemo sredstva i sva ta sredstva će ići ne ovaj konto nabavke zgrada. Nabavka zemljišta – ne znam da li ste bili na Kolegiju, jer ja sam upoznao Kolegij da smo imali sastanak nas tri načelnika iz tri općine sa donjeg sliva rijeke Spreče, sa ministrom poljoprivrede i sa direktorom Agencije „Sliv rijeke Save“ gdje su nam rekli da moramo imati planiranu stavku nabavka zemljišta radi eksproprijacije, jer se 2020. godine planira da općina izvrši eksproprijaciju, a u 2021. godini da se ide na izmjenu korita rijeke Spreče i da se rade nasipi i zaštite od ovih poplava. Sada imamo i ovu tačku koja je uvrštena u dnevni red tako da smo planirali i dobro je da uvijek imamo planirano za eksproprijaciju, odnosno za kupovinu zemljišta, da možemo kupiti to zemljište. Dobrovoljno vatrogasno društvo je formirano. Ja sam pozvao kada sam davao izjave Televiziji Tuzlanskog kantona i danas pozivam ko god želi može se učlaniti, jer je to dobrovoljno vatrogasno društvo. Stavka ovih 10.000 KM je za njihove troškove i za nabavku opreme. Mi smo već nabavili makaze u slučaju sudara i nabavili smo određeni dio opreme za pet vatrogasaca i još ćemo nabaviti, kao i za plaćanje dodatne obuke. Nije vatrogasac ribar, pa da ide da se zeza i peca nego on stavlja svoju glavu na kocku. Tako da moramo te momke koji su se prijavili, a ima njih dosta, dobro obučiti, da dobiju certifikate i da bude sve u skladu sa zakonom. Nema plaćanja, a neki dušebrižnici su pustili da su neki primljeni da rade, a to su naša posla, jer svi znamo ko odgovara za smutnje i ko se bavi sa smutnjama. Dobrovoljno vatrogasno društvo radi na dobrovoljnoj osnovi, imamo predsjednika udruženja, imamo komandira desetine, a to je Ermin Mujkanović, uposlen je u Općini Doboj Istok, imamo par momaka iz komunalnog preduzeća i iz općine. Pravimo jednu jedinicu i još nećemo otkazivati ove ljude profesionalce dok ne vidimo da naši ljudi mogu sami da idu u akciju. Hvala Bogu nismo do sada imali ni potrebe za tim i ja sam rekao dabogda nam ovo vozilo služilo za zaljevanje cvijeća i za pranje ulica i da nam nikada ne zatreba za ono za što je namijenjeno.“

Emira Karić, predsjednica kluba vijećnika SDP: „Postavila sam pitanje vezano za Dobrovoljno vatrogasno društvo smatrajući da ovo nije dovoljan iznos. Mislim da u prvoj godini treba krenuti sa baš dobrim planom koji ne može pokriti ovih 10.000. Čak u toj prvoj godini smatram da trebate posjetiti neke Evropske zemlje, odnosno dobrovoljna vatrogasna društva što iziskuje znatno veća sredstva. Trebalo je to Dobrovoljno vatrogasno društvo da napravi neki plan rada i naravno predvidjeti određene troškove. Ja samo želim da usmjerim priču u dobrom smjeru i smatram da 10.000 nije dovoljno, jer tu treba uvijek naknadne opreme, pa i nekih obilježavanja, nekih manifestacija, a to se zaista ne može uklopiti u 10.000. Hajmo reći da je dobro što ima zasad 10.000. Kažete neki dušebrižnici, treba stvarno razlučiti kada je kritika pozitivna, ali sam je načelnik plasirao priču o profesionalnoj vatrogasnoj jedinici. To nisam ja forsirala, ja sam čak uložila amandman na tu odluku da se osnuje dobrovoljno vatrogasno društvo. Znači imala sam bolju i snažniju viziju od gospodina načelnika. On je plasirao i ljudi su zbunjeni smatrajući jesi li sada Erka privatni ili profesionalni ili dobrovoljno, odnosno volonter. Znači, ljudi su zbunjeni i ja pokušavam to objasniti da ide priča o dobrovoljnom vatrogasnom društvu i to će biti jako pozitivna priča samo ako izuzmemo politiku, a nadam se da hoćemo, ali u nadi je kaže i mali Jože umro, tako da ni od toga nema ništa.“

Mehmed Mehinović, predsjednik kluba vijećnika SBiH: „Mala replika. Očito se vidi, kako reče Emira, da je dobar nijet predlagača Budžeta. Ja dolazim iz Mjesne zajednice Velika Brijesnica i vjerujte mi, jer sjedim često i družim se sa ljudima svaki dan i kažu da je planirano pokrijevanje stadiona - tribine. Pita me čovjek ima li to u budžetu? Ja to nisam vidio. Pita me ima li kanalizacije planirane? Ima neke kanalizacije planirane, ali gdje je planirano ja ne znam. Možda bi neke špekulacije eliminisali da se samo 10 – tak rečenica napiše. Ja bih tako rado digao ruku za ovaj budžet, vjerujte mi, jer nije loš. Nemojte da pričamo o softveru, softver izbací budžet to je tačno, ali može se dopunska kolona napraviti i upisati plan i ocjena za devet mjeseci šta je bilo i procjenu za 12 mjeseci napraviti. Pravilo se to. Nisam ponio budžete od nekoliko općina da vam pokažem da ima i ta kolona, onda bi puno lakše pričali o budžetu. Rekao sam na početku da je ovo dobronamjerno, jer puno bi lakše bilo za ljude koji ne znaju finansije da učestvuju u tumačenju budžeta. Ja sam naveo 2 – 3 primjera o kojima ne znam, ali evo možda mi i ne trebamo znati, možda treba da zna ko zna. I ja ću reći, naravno da je SDA na vlasti i naravno da to SDA radi, ali samo da pojasnim svojim komšijama da će se praviti tribine. Šta je problem da se to napiše?“

Emira Karić, predsjednica kluba vijećnika SDP: „Imam pravo na repliku svaki puta. Repliciram kolegi Mehmedu. Budžet nije SDA – ovski, budžet je građana i ne možemo reći da to radi SDA. Dokle god budemo govorili to, neće biti dobro. Budžet je građana i sve što se radi na općini Doboj Istok rade građani. To smo mi postigli iz naših sredstava. Vlast je samo da li će dobro to napraviti, da li će smuljati, da li neće itd.“

Kemal Bratić, općinski načelnik: „Ja imam čitav dan slobodno vi replicirajte i govorite onako kako nije. Ja ću izlaziti, imam snage, hvala Bogu odmorio sam se, demantovati ono što vi kažete. Budžet predlaže općinski načelnik koji dolazi iz Stranke demokratske akcije. Budžet usvaja Općinsko vijeće koje je šaroliko. Hvala Bogu mi smo jedna od rijetkih općina koja ima 8 političkih stranaka. Sva planirana kapitalna ulaganja na području općine Doboj Istok ne radi sam načelnik, nego radi u saradnji sa savjetima mjesnih zajednica. Koga god interesuje može se informisati u savjetu mjesne zajednice odakle dolazi i trebao bi da zastupa, kao što to rade određene mjesne zajednice, kada se radi o određenim pitanjima. Nekoliko puta sam ovdje rekao da ukoliko neko neće nešto da vidi, on to neće vidjeti. Nakon toga što sam ja objasnio zašto moramo imati stavku nabavka zgrada, vi opet nalazite neke mahane. Svejedno i da je napisano tamo, a ja sam rekao službi da to napišu i ne znam zašto nisu napisali, a vjerovatno će biti u narednom periodu napisano kada budemo ostvarili određene projekte. Sami ste sebe demantovali da je veoma teško doći do sredstava. Ako je neko od vas ovdje prisutnih mislio da ona sredstva koja su planirana da ih povučemo sa viših nivoa da se ona podrazumijevaju, grdno se vara. Dosta vas ovdje zna da mora da bude i zamolbi i lobiranja da bi došla jedna marka na neku općinu. Mogli smo mi planirati budžet 40 miliona KM, ali ga nećemo ostvariti. Ovo je realan budžet. U kapitalnim ulaganjima ja kao općinski načelnik imam određen plan. Imali smo u ovoj godini rekonstrukciju doma kulture u Klokočnici, dobili smo 120.000 KM od višeg nivoa, radovi koštaju 160.000 KM, pa imamo iduće godine opremanje unutrašnjosti tog doma kulture da ga dovedemo u njegovu svrhu. Znači moramo naći sredstva i moramo planirati i evo neke druge stvari. Mi smo toliko mala sredina da svako od nas zna sve i šta je planirano i gdje će se potrošiti i koliko košta. Ima nadzornih organa više nego bilo koja firma koja se bavi tim poslovima. Znači radovi započeti ovdje na ovoj raskrsnici u Klokočnici i toliko je nadzornih organa i komentara na fejsbuku, načelnik ovo, načelnik kupio, a načelnik niti vodi proceduru, niti raspisuje, sve radi Federalna direkcija cesta, ali nažalost takav smo narod. Sada kada se dobiva kontura te raskrsnice, ti isti kritičari daju i pozitivno mišljenje. Nažalost takvi smo kakvi jesmo, ali se nadam da će se u nekom narednom periodu i to promijeniti. Naravno predsjedavajući ostaje mi pravo da se opet javim ako bude potrebe.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavaње. Ko je za ovaj Budžet?”

Glasanje: ZA – 10, PROTIV – 0, UZDRŽANIH – 6.

Emira Karić je zatražila pauzu.

Predsjedavajući je dao pauzu od 5 minuta.

Sjednica je nastavljena u 11,35 sati.

Senada Džanić je napustila sjednicu zbog bolesti.

Ad.3. Razmatranje i usvajanje prijedloga Odluke o izvršenju Budžeta općine Doboj Istok za 2020. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavaње. Ko je za ovu Odluku?”

Glasanje: ZA – 14, PROTIV – 0, UZDRŽANIH – 0 (Mirzet Mujkić je trenutno odsutan).

Ad.4. Razmatranje i usvajanje prijedloga Odluke o uspostavljanju i održavanju zona zaštite i mjerama zaštite područja izvorišta za snabdijevanje vodom sa bunara BK-2/NB-2 u naselju Klokočnica i bunara EB-1 u naselju Brijesnica Velika, općina Doboj Istok.

Dr. Ferid Konjić, predsjedavajući Općinskog vijeća: „Prijedlog Odluke ste dobili, dajem tačku na diskusiju. Ne vidim prijavljenih diskutanata i dajem na izjašnjavaње. Ko je za ovu Odluku?”

Glasanje: ZA – 15, PROTIV – 0, UZDRŽANIH – 0.

Ad.5. Razmatranje i usvajanje prijedloga Odluke o agrotehničkim mjerama zaštite i korištenja poljoprivrednog zemljišta na području općine Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.”

Emira Karić, predsjednica kluba vijećnika SDP: „Ovdje se zaista radi o dobrom prijedlogu Odluke i naravno smatram da će jednoglasno biti prihvaćen. Potpisujem svaki član, jer toliko je dobro uređeno sve što stoji u ovim članovima. Obuhvaćeni su svi trenutni problemi i svi trenutni nedostaci koji se događaju, ne samo na našoj općini, nego je vezano i za cijelu državu. Ne mogu da ne kažem sa čime se ne slažem. Kada je u pitanju nadzor, to je član 36. gdje kaže: Nadzor nad provedbom ove Odluke vrše nadležna tijela državne uprave i nadležni inspektori pri kantonalnoj upravi za inspekcijske poslove Tuzlanskog kantona. Šta to sada znači? Kome se obratiti? Kada i kako intervenirati? Smatram da ukoliko taj inspektor bude nadležan kada djeluje i kako djeluje pri našoj općini? Da li dolazi po intervenciji? Da li u svom upisu rada treba da obilazi svaki dan drugu općinu? Nije razjašnjen upravo taj član 36. a smatram da se ovom problematikom zaista treba pozabaviti neko ko može biti nadležan i pri općini, jer bi onda uozbiljili. Uostalom mislim da će ovo biti mrtvo slovo na papiru. Kaznene odredbe nisu prikazane osim što je rečeno da je u službenim novinama Federacije i možda je trebao biti jedan dodatak. Sugestija sekretaru da kada su ovakve odluke u pitanju nije loše da imamo neke dodatne materijale. Ja ću i dalje tvrditi da je veliki nedostatak Općinskog vijeća sekretar Općinskog vijeća. Mislim da to treba biti jedna osoba

i ta bi osoba bila, kao što je i prije, u velikoj saradnji sa vijećnicima i sve ove nedstatke koje mi pokušavamo preko nekih negativnih riječi jedni drugima, možda bi nam taj sekretar Općinskog vijeća razjašnjavao i bilo bi prilično lakše raditi u samom Vijeću.“

Kemal Bratić, općinski načelnik: „ Mi imamo sekretara Vijeća. Čovjek je tu svaki radni dan i ni jednu godinu nije iskoristio ni pola godišnjeg odmora. Svaku informaciju on raspolaže i mora saradivati sa vijećnicima, pa tako i sa zaposlenicima općine Doboj Istok. Kada se radi o nadzoru vi ste to dobro primjetili, ali u suštini to je dobra stvar. Općina Doboj Istok nema inspeksijsku službu. Inicijativa ili ideja za usvajanje jedne ovakve odluke jeste upravo sastanak sa kantonalnim inspektorima za poljoprivredu i za veterinarstvo, jer smo imali problem nomadjenja. Ja sam kao načelnik poslao jedan dopis kantonalnim inspekcijama, jer se tu malo lome nadležnosti ko treba reagovati, kako reagovati i ko je sljedeća stepenica i šta poduzimati u određenim mjerama. U prošloj godini imali smo dosta poziva, dosta intervencija, dopisa od naših građana koji imaju zasade djeteline ili šta se sve u to vrijeme sije i onda smo inicirali taj sastanak sa kantonalnim inspektorima. Oni su jedini nadležni i da općina Doboj Istok ima inspekcije ne može imati tog inspektora. Tamo ima propisano zakonom kojeg možemo tržišnog, sanitarnog, građevinskog i vjerovatno ćemo u narednom periodu i imati neke od tih inspektora koji će raditi ono što je njihov zadatak. Kada se radi konkretno o inspekcijama, ja sam neki dan takođe bio na sastanku, gdje smo na neki način dobili pohvalu da naši privrednici, privredni subjekti i sva druga pravna lica, imaju dobru saradnju, da su korektni kada dođu inspektori i da je veoma rijetko, ne znam da li je bilo ikako intervencija policije prilikom vršenja nadzora inspekcije. Ovdje smo imali problem sa ovim nomadima gdje ljudi dovedu 2 – 3 stada od 400 – 500 ovaca i onda oni prave štetu, nemajući mjere. Mi onda moramo imati ovu odluku, a morali smo je davno imati, ali nikada nije kasno, jer ona reguliše određene stvari kako nadzora tako i sankcionisanja i izricanja kazni. Da li je to kazna od naše službe ili od neke kantonalne inspekcije o tom potom. Ono što je bitno da i vas izvijestim da smo napravili hodogram ukoliko se i ove godine, odnosno naredne u proljeće budu pojavili ti nomadi kako riješiti taj problem. Ključni problem je bio nakon formiranja karantena ko će platiti prevoz tih ovaca tamo gdje su njihovi vlasnici. Ja sam rekao nikakav problem nije dajte da ispoštujemo zakonske procedure sve će to platiti općina, a kada budemo na sudu sa tim nomadima oni su po zakonu dužni da nam vrate troškove. Tu je uključena i naša policija, jer je bio prisutan i komandir Policijske stanice. Mi smo prošle godine morali angažovati specijalne snage za održavanje reda i mira da bi ih protjerali i onda se ispostavilo da ima jedno stado i sa općine Gračanica koji im tamo ne daju. Ja sam juče vidio njih tamo u općini Gračanica tako da ih je za očekivati. Naši policajci njih protjeraju na jednu parcelu ili samo odu malo u drugu općinu, a naveče se opet vrate i smjeste se u nekom potoku itd. Dajemo sve od sebe da pomognemo našim farmerima da zaštite svoja dobra koja su zasijali. Ovaj član 36. koji ste vi rekli nadzor isključivo ima kantonalna inspekcija za poljoprivredu i za veterinarstvo. Naravno Policijska stanica je prva instanca koja će reagovati, koja će zadržati te nomade i obavijestiti kantonalnu inspekciju. Oni bi po pravilu morali imati potpisan ugovor za iznajmljivanje zemljišta na području naše općine koji je sačinjen u Službi za poduzetništvo i finansije. Niko od njih to nema i onda smo dogovorili način kažnjavanja, sankcionisanja i sve ostalo. Nemojte da vas ovo buni, jer oni su isključivo nadležni za to, imaju veterinare i laboratorije, ako nisu ušne markice stavljene. Otvorili smo i taj problem da ga pokušamo u narednom periodu što kvalitetnije riješiti. Hvala vam za ove pohvale za prijedlog Odluke.“

Emira Karić, predsjednica kluba vijećnika SDP: „Imamo problema i u drugim članovima koji se spominju u ovoj Odluci vezano za živice, za puteve, za paljenja, za stajsko gnojivo itd. Sve je to regulisano i ja samo postavljam pitanje kome se obratiti? Znači ako je primjećemo da je u blizini poljoprivrednik moraju se neke stvari, bez obzira da li je poljoprivreda nama bila jako bitna ili manje bitna, u svakom slučaju svakoj zemlji je itekako bitna. Kome se obratiti? Je li to na telefon Policijske stanice kojem građanin prijavljuje da je neko izvršio jako veliku paljevinu, da je veliku količinu stajskog gnojiva blizu naselja itd. Nije mi jasno u tim odredbama ili se direktno zove samo ako možete pojasniti. Ja sam htjela sa mjesta, ali ne date mi baš uvijek sa mjesta.“

Dr. Ferid Konjić, predsjedavajući Općinskog vijeća: „Ima li još diskutacija? Ne vidim prijavljenih. Ko je za ovu Odluku?“

Glasanje: ZA – 15, PROTIV – 0, UZDRŽANIH – 0.

Ad.6. Razmatranje i usvajanje prijedloga Odluke kojom se utvrđuje da je od javnog interesa izgradnja pristupnog puta i parking prostora za potrebe JZU Dom zdravlja Doboj Istok i MZ Klokočnica.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Kemal Skopljak, vijećnik BPS: „Ovaj prijedlog u svakom slučaju ja ću da podržim, jer je konačno došlo nešto što je mene jako obradovalo. Svi znamo kakav imamo problem gore u hitnoj i Domu zdravlja vezano za pristupni put i parking. Nadam se da će ovo biti rješenje svega toga, s tim što bih vas zamolio kada se rade ovakve stvari mi imamo u našoj općini Komisiju za borbu protiv korupcije. Kada bude sve završeno želimo normalno da znamo koliko će koštati taj kvadrat, ko vrši pregovore i na koji način. Znači ovo bi trebalo provući kroz tu komisiju da zaštitimo one ljude koji dogovaraju i pregovaraju ovakve stvari.“

Kemal Bratić, općinski načelnik: „Ovo je samo jedna stepenica u nizu koji moramo u narednom periodu da uradimo. Niko neće kupovati zemljište, a da vi ne kažete ta je cijena i zna se ko pregovara. Komisija je samo tijelo koje priprema materijale za Općinsko vijeće. Nemojte me krivo shvatiti, uvaženi vijećniče, da ste vi sudija, kadija, tužilac itd. Komisija je protočni bojler koji priprema materijale i naravno razmatra žalbe, ukoliko ima žalbi i ukoliko je osnovano da se tamo prijavi gdje treba da se prijavi i ukoliko sumnjate ili smatrate da je neko uradio nešto kako ne treba. Kada se radi o ovom problemu, nije ovo samo problem Doma zdravlja, ovo je širok problem. Mi ćemo morati, to je moje mišljenje, ne znam kako vi razmišljate, a vjerujem da vas je 95 % mog mišljenja, da u narednom periodu Vijeće donese odluku o naplati parkinga na javnim površinama koje su u vlasništvu općine Doboj Istok. Ne da bi mi zaradili nešto ili da bi vratili novac koji ćemo dati za zemljište, nego da bi uveli reda. Mi imamo i ovdje na ovom našem parkingu 5 – 6 vozila, ne znamo čija su, a znaju biti po 4 – 5 dana, isto tako i u zanatskom centru Klokočnica i u Brijesnici Velikoj, pa ima i tamo u Maloj Brijesnici ili gore kod kafića Kvin. Sve su to parkinzi ili zemljište u vlasništvu Općine Doboj Istok i smatramo da ćemo na taj način uvesti reda i da će biti manje gužve i da će onaj kome je kuća 300 metara od Korza ili od Feniksa doći pješe, da neće doći autom, jer valja platiti parking. Mi ćemo gledati sa službom, tu je i Abdulah, da se pripremi odluka o naplati parkinga, pa neka bude simbolična cijena i ne da bi općina Doboj Istok ili neka mjesna zajednica imala korist nego da bi uveli malo reda. Isto tako preko puta knjižare Ado imamo problem sa divljnim taksistima. Meni oni ne smetaju, ali smetaju onim drugim koji su prijavljeni, koji plaćaju obaveze državi. Policija je insistirala da gore uradimo parking za taksiste, pored parkinga koje ćemo ostaviti vlasnicima uz mogućnost ukoliko žele potpisati ugovor da plaćaju određenu naknadu na godišnjem nivou i mi ćemo njima ostaviti da taj parking i koriste. Kažem ova odluka je samo jedna stepenica, imamo još dosta toga da uređujemo. Ponavljam opet pravimo sve sa nule i uvodimo red, a kada se uvodi red i sistem nije baš svima tako drago. Ovo što vi kažete za te živice, meni niko ne treba govoriti za moju živicu, ja je sam trebam iskrčiti. Ako sam imalo domaćin trebam je sam iskrčiti, ali nažalost ima svega. Evo ove godine smo radili dosta tih brdskih i poljskih puteva upravo da ljude stimuliramo da to iskrče i ima efekta, ima pomaka. Ako sam bio jasan ovo je samo prvi korak, u sve radnje je uključen naš pravobranilac i naša služba, pregovore ćemo obaviti i završiti, a Vijeće će biti upoznato, jer naravno raspolaže imovinom i nema niko osim Vijeća pravo da donosi bilo kakvu odluku kada se tiče prodaje, kupovine ili bilo čega vezano za imovinu općine Doboj Istok.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavaње. Ko je za ovu Odluku?“

Glasanje: ZA – 15, PROTIV – 0, UZDRŽANIH – 0.

Ad.7. Razmatranje i usvajanje prijedloga Odluke o davanju saglasnosti za prekategorizaciju lokalne ceste Klokočnica – Lukavica – Kapetani u regionalnu cestu

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju. Ne vidim prijavljenih diskutanata i dajem na izjašnjavaње. Ko je za?“

Glasanje: ZA – 15, PROTIV – 0, UZDRŽANIH – 0.

Ad.8. Razmatranje i usvajanje prijedloga Rješenja o konačnom imenovanju člana Upravnog odbora JU Centar za socijalni rad Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, dobili ste stav komisije i dajem tačku na diskusiju. Ne vidim prijavljenih diskutanata i dajem na izjašnjavaње. Ko je za ovo Rješenje?“

Glasanje: ZA – 15, PROTIV – 0, UZDRŽANIH – 0.

Ad.9. Razmatranje i usvajanje prijedloga Rješenja o prijedlogu za imenovanje članova Nadzornog odbora JKP „Čisto“ doo Doboj Istok.

Dr. Ferid Konjić, predsjedavajući Općinskog vijeća: „Materijal ste dobili i stav komisije, dajem tačku na diskusiju. Ne vidim prijavljenih diskutanata i dajem na izjašnjavaње. Ko je za ovo Rješenje?“

Glasanje: ZA – 15, PROTIV – 0, UZDRŽANIH – 0.

Ad.10. Razmatranje i usvajanje prijedloga Programa rada Općinskog vijeća za 2020. godinu.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Emira Karić, predsjednica kluba vijećnika SDP: „Ko je duže u Vijeću zna da je ovo, hajmo reći, standardni okvir. Ja sam na Kolegiju rekla da imam nekih amandmana, ali odsutala sam. Htjela sam da uložim amandman kada je u pitanju Informacija o zloupotrebi narkotičkih sredstava sa prijedlogom mjera za suzbijanje istih na području općine Doboj Istok i moj prijedlog je trebao biti da se dva puta, ukoliko je moguće, podnosi ta informacija. Međutim, odustala sam. Ovo je zaista veoma bitna tačka dnevnog reda, jer pojavile su se i u medijima neke informacije sa područja naše općine, a pošto je u pitanju mjesec juni malo ćemo sačekati, ali da pretres ove tačke bude jako kvalitetan i da imamo kvalitetne zaključke. Mi te informacije uglavnom prihvatamo, ali kada se vratimo i kada izanaliziramo šta je bilo ponuđeno u tim informacijama ne bi trebali biti zadovoljni. Ako nam sjećanje bude služilo za sljedećih šest mjeseci da se zaista pozabavimo detaljnije sa ovom tačkom koja će biti, kako je ovdje planirano, u junu mjesecu. Moram reći da ste, da smo vješto izbjegli izvještaje komisija koje su formirane pri Općinskom vijeću. To nam nudi jedan front ko naravno osjeti potrebu može nam spočitavati kako smo netransparentni, kako smo određeni neradnici kada su u pitanju komisije koje su naša dužnost kao vijećnika. U obrnutom smislu ni mi vijećnici ne bi trebali drugima spočitavati kako su informacije štune ili ih nema itd. Ne znam samo zbog čega se dvije godine izbjegavaju izvještaji komisija, jer neke rade i bilo bi materijala ovdje za tačku dnevnog reda, a neke su ostale minorne kao i neki vijećnici u ovom Općinskom vijeću.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih. Ko je za ovaj Program?“

Glasanje: ZA – 14, PROTIV – 0, UZDRŽANIH – 0 (Safet Smajilbašić je trenutno odsutan).

Ad.11. Razmatranje i usvajanje Programa rada Općinskog načelnika za 2020. godinu.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Emira Karić, predsjednica kluba vijećnika SDP: „Opet ću krenuti sa nekim negativnostima. Jako štur izvještaj kao i uvijek do sada. Izvršit ću paralelu kada je u pitanju moje zanimanje. Ja u avgustu mjesecu pripremam plan rada za svojih 15 učenika i htjela sam donijeti svoj registrator koji sa januarom mjesecom ima 200 stranica, što sedmične, što dnevne i mjesečne pripreme sa korekcijama itd. U januaru mjesecu bit ću ponovo aktivirana na planu rada do juna, tako da će moj plana rada, ako vas zanima, biti oko 400 stranica za 14 učenika. Zato da nemam riječi za ovoliko malo listića da bude nešto što treba zadovoljiti 10.000 građana na području općine Doboj Istok.“

Kemal Bratić, općinski načelnik: „Ja želim da se zahvalim uvaženoj vijećnici Emiri na pohvalama za Program rada, nije izvještaj, nego program rada. Načelnik je mogao da bude 4.800 listova u tom planu, jer svaki dan preko njegovih ruku pređe preko 200 – 300 listova koje vi pominjete da imate za jednu godinu. Ovdje se ne radi samo o radu načelnika, nego se radi i o radu službi, ukoliko ste čitali. Ja sam na neki način odgovorno lice i rukovodilac ovog organa koji vodi sve tako da vi treba jedan dan da dođete i da se družite ovdje sa nama i da vidite koliko to listova dnevno prođe kako kroz načelnikove ruke, tako i njegovih pomoćnika, sekretara općine itd. vjerovatno bi malo drugačije razgovarali i pregovarali. Dovoditi nešto u neozbiljnost na ovakav i štur način to zbilja nije fer i nije korektno. Nemam više načina niti razloga da vama objašnjavam ovaj svoj program rada. Vi ćete vidjeti kroz naše aktivnosti koje ćemo mi raditi u toku iduće godine šta je to naš program rada i kakav je to naš način rada. Vi se držite toga što, po meni, dobro radite i povećajte to na 4.000 listova da bude u toku godine.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih. Ko je za ovaj Program?“

Glasanje: ZA – 13, PROTIV – 0, UZDRŽANIH – 2

Ad.12. Razmatranje i usvajanje Izvještaja o ostvarenju godišnjeg plana implementacije strategije integriranog razvoja Općine Doboj Istok za 2018. godinu.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Mehmed Mehinović, predsjednik kluba vijećnika SBiH: „Malo mi je poružno da prođe ovakav materijal, a da se ne progovori o njemu par riječi, pa ću ja ovdje svoja lična zapažanja iznijeti. Neko se potrudio zaista da napiše dosta podataka, dobrih podataka. Jeste da djeluju nekada i zamarajuće, međutim ima jako interesantnih stvari koje se mogu naći. Mene posebno raduje ova informacija, jer sam nakon 362 dana od postavljenog mog vijećničkog pitanja dobio oko 40 % odgovora na ta svoja ponovljena pitanja. Nije baš odgovoreno 100 %, ali sam mogao naći jedno 40 % odgovora na to pitanje. Nadam se da će ostalih 60 % u sljedećih 362 dana doći i da ću završiti mandat da mi se na postavljeno vijećničko pitanje odgovori. Možda se htjelo s tim da ne postavljam više vijećničkih pitanja, jer su nezdgodna ili možda ne valjaju itd. Iz tih razloga ih i ne

postavljam, ali došao sam do toga. Znači čestitke onome ko je ovo radio, zaista dobar izvještaj i ako bi mogao staviti jednu primjedbu da se možda na pet – šest mjesta spominje realizacija nekih projekata npr. škola u Doliću, za plastenike, za deminiranje itd. pa postaje to dosadno. Moguće je da je to bila metodologija izrade, kasnije sam to shvatio, ali čovjek se zamara što se ponavljaju te stvari. Ono što sam htio reći jeste da svako ovo sačuva i da pročita, kada bude imao vremena. Drago mi je da je ovdje konstatovano i ja im odajem priznanje Humanitarnu organizaciju Emmaus obrađivač je pohvalio – važno je napomenuti veliki broj realizovanih projekata iz svih sfera života od strane projektnih timova Humanitarne organizacije MFS Emmaus općina Doboj Istok. Hvala im i u moje ime što su se potrudili da pomognu ako je dosta projekata realizovano kroz njihove projektne timove i da su uradili te projekte. Po mojoj procjeni tu saradnju treba i dalje širiti, jer oni imaju te timove, imaju ljude koji govore njemački i turski itd. i treba tu saradnju još više oplemenjivati. Šta je bitno ovdje po meni i o čemu treba voditi računa izvršni organ, a možda i mi kao Općinsko vijeće jeste kada se govori o sektoru ekonomskog razvoja. Često ovdje svi govore i mi imamo izvještaj privrede, imamo izvještaj Porezne uprave, hvalimo našu privredu da su zaista dobri i jesu dobri, jer oni to rade zaista dobro, a čuli smo i kroz budžet da se ostvaruju poreski prihodi. Međutim, jedan glavni projekat koji je bio u sferi ekonomskog sektora je projekat osnivanja Udruženja poslodavaca i obrtnika kao projekat osnivanja privrednog savjeta nije realizovan. Kažu nezainteresovanost privrednika, ali mora se nastaviti i dalje o ovome razgovarati, jer nama je u interesu ako smo ga ovdje na Vijeću usvojili kao projekat iz ekonomskog sektora broj 1. da se, izvinite na izrazu, jaše na tom problemu i ubuduće i da se on ne stavi ad akta i da se uspostavi saradnja. Često čujem od drugih ljudi ovdje za govornicom ja sam svakodnevno sa privrednicima, pa kako se ne ubijede privrednici da je ovo tako neophodno, pogotovo što se nude i troškovi da se to realizuje. Ne bih želio da ovo ne bude realizovano, jer smo ga postavili kao strateški cilj broj 1. iz ekonomskog razvoja općine Doboj Istok. Na ovom problemu treba raditi, ali nisam htio da ga ne prokomentarišem. Šta je bitno za općinu Doboj Istok iz ove metodologije jeste da je općina Doboj Istok i dalje rangiranja na 48 mjestu u Federaciji, što je po meni od 100 i nešto općina jako solidno moramo to priznati, bez obzira kakvi su parametri uzeti. Je li to teritorija, je li to broj učenika, međutim 48 mjesto je nešto što je dobro i to treba zadržavati na osnovu ovih parametara. Na Kantonu smo na 7 mjestu što je takođe dosta dobro kada znamo u kakvom smo okruženju, kako su jake općine itd. Još bi se osvrnuo na strategiju na ključne makroekonomske pokazatelje i preporučio bih svakome da to pročita. Mene zabrinjava da mi imamo 1451 penzionera, a trenutno 9000 lica. To je negdje oko 15 % penzionera, pa postajemo otprilike zemlja penzionera. Ako znamo da je više umrlih nego rođenih skoro za 30% po godini i ja se ponovo vraćam na svoj amandman i hajmo makar nagraditi treće dijete, pa da nađemo 15.000, jer to ne košta više od 15.000 i da mi nešto poduzmemo. Znamo mi da mi to ne možemo riješiti, ali da nam je savjest čista, jer smo nešto poduzeli. Prema tome ovo je nešto što može biti opasno za općinu Doboj Istok ovoliki broj penzionara, a smanjuje se broj radnika i to bi po meni mogla biti opasnost. Još veći i zabrinjavajući faktor kada se pogleda koliko dolazi u Doboj Istok od penzija, a to je negdje oko 498.000 i kada se podijeli sa brojem penzija, znači da su prosječna primanja tih penzionera oko 360 KM. U ovakvoj situaciji nije dobro da 1450 ljudi živi sa svojim porodicama po meni od 360 KM. Prema tome mi kao Vijeće imamo o čemu da razgovaramo u budućnosti, ima to i izvršni organ sa svojim saradnicima da razgovara. To je nešto što nisam mogao da ne podijelim sa vama. Prosječna plata nam je malo rasla i ona je 551 KM i dobra je. Moram reći da je broj zaključenih brakova 78, a razvedenih 10, što nije alarmantno. Neki dan sam gledao u Srbiji koliko se sklopi brakova, toliko je i razvedenih brakova. Mi smo još vezani za tu porodicu i držimo se. Sve u svemu daje dobru sliku, međutim neki indikatori pokazuju da se možemo naći u nekoj opasnosti u narednom periodu. Još jedanput da ponovim poentu svega ovoga, meni je drago što je ovaj materijal došao i hvala onom ko ga je napravio, svašta se ima pročitati. Osim zamjerke da se ponavljaju neki projekti, pogledajte pa ćete vidjeti, ali metodologija je vjerovatno takva. Meni je osobno drago da sam nakon 362 dana od postavljenog vijećničkog pitanja i ponovljenog dobio djelimično odgovor na to. Klub Stranke za BiH podržat će ovaj izvještaj.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjenje. Ko je za ovaj Izvještaj?“

Glasanje: ZA – 15, PROTIV – 0, UZDRŽANIH – 0

Ad.13. Razmatranje i usvajanje Informacije o provedenim aktivnostima povodom obilježavanja Dana državnosti BiH.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjenje. Ko je za ovu Informaciju?“

Glasanje: ZA – 15, PROTIV – 0, UZDRŽANIH – 0 .

Mehmed Mehinović, predsjednik kluba vijećnika SBiH: „U svoje ime i u ime kluba Stranke za Bosnu i Hercegovinu u Novoj godini svima vama prisutnim i vašim porodicama želim prije svega puno zdravlja, puno poslovnog uspjeha i sve želje neka vam se ostvare iskreno, najiskrenije.“

Dr. Ferid Konjić, predsjedavajući Općinskog vijeća: „Na ovaj način smo došli do kraja ove sjednice. Ovo je posljednja sjednica u ovoj godini i ja svima vama želim u svoje ime i ispred rukovodstva Općinskog vijeća puno zdravlja i sreće u idućoj godini.“

Sjednica je završena u 12,10 sati.

ZAPISNIČAR
Behara Hadžić

SEKRETAR
Omer Hadžić

PREDSJEDAVALJUĆI
OPĆINSKOG VIJEĆA
dr. Ferid Konjić

Službena zabilješka:

Zapisnik je usvojen na 33. redovnoj sjednici Općinskog vijeća Doboju Istok održanoj dana 25.01.2020. godine.

U Klokotnici, dana 30.01.2020. godine

Zabilješku sačinio
Omer Hadžić, sekretar Općine